

HITZ BITAN

HIRI GARRAIOAK. Langabeak lirateke lehenak

ACK herritarren garraioa urririk izateko ikerketa batzordea osatzeko eskatu du BAMen

Aitor Renteria | BAIONA

Langabeziaren Kontra Ekin (AC) taldeak bi eskari garrantzitsu egin dizkie BAMeko (Baiona, Angelu, Miarritze barrutia) hautetsiei. Lehenik, hiri garraioak urririk eskaintzeko aukera aztertzeko ikerketa batzorde bat osatzea eskatu dute. ACren arabera, batzorde horrek BAMeko hiri elkargoan proiektu horren eragingarritasunari buruzko txosten zehatz bat argitaratu beharko luke hemendik urte batera.

Eragingarritasuna aztertzen den epean, egoera larrian daudenei eta langabeen familiei hiri garraioa urririk eskaintzea anartean aldarrikatu du ACK, oroitaraziz Frantzian, 120 sare

ezberdinetan, langabeek ez dutela txartelik ordaintzen, bertzeak bertze Bordelen, Pauen, Nimesen eta Grenoblen.

BAMen langabe batek 16,5 euro ordaintzen du hilabeteko agiriarengatik, 165 pertsonen asteko agiria dute, eta 533k hilabetekoa.

Bi eskarien eragingarritasuna frogatzeko, ACK horrelako egitasmoak bertze zenbait herritan gauzatu direla jakinarazi du: Vitre, Compiègne eta Chateauroux hiri elkargoetan. Horretarako zergak ez liratekeela hazi dio ACK. Chateaurouxen finantziabide gisa enpresen gainera zergak %0,05 emendatu dituzte, hau da, 5 euro langile bakoitzeko. Horri esker, hiri garraioa urririk eskaintzen dute.



BOB EDMÉ

ACKo kideak, atzo, Baionan, langabeentzako garraio publikoak eskatzen.

«Chateaurouxen erabiltzaileen kopurua bikoiztu da urtebetan, gero eta auto gutxiago baliatzen dira, ordutegiak hobe errespetatzen dira eta jendeak behin baino gehiagotan erabiltzen du autobusa egunean», gaineratu du ACK.

Hiri garraioa ikuspegi sozia-

letik aztertu behar da ACren us-tez, ez turismo edo errentaren ikuspegitik. Horregatik, BAMeko hautetsi guztiei helarazi die-te eskari hau. Gutxik erakutsi dute, ordea, egitasmoarekin atxikimendua: J.Breque (PS), C.Sarhy (LCR), Martine Bisaut (Berdeak), Gisele Lougarot

(AB) eta Xabi Larralde (Batasuna) alderdietako kideek. Miarritze-ko sei hautetsi abertzaleek adostasuna adierazi badute ere, ez dute engaiamendurik hartu.

Jarrerak aldatzen ez badira, ondoko asteetan bertze ekinbi-de batzuk erabiltzeko prest daudela jakinarazi zuen ACK.



MAURA BLACK

INAUTERIAK

Gaur ospatuko dute baionesek Inauterietako egun nagusia

Eskoletako haurrek ireki zuten atzo Baionako inauteria. Ohi bezala, eskola bakoitzak bere pankartaren giblean burutu zuen ibilbidea Baionako karriketan. Azkenean, Herriko Etxearen aitzinean bildu ziren haur guztiak mozturorotik, Zantantzarr kantatzeko. Seaskako bi ikasleek haurrak saldoan heldu ziren, eta talde koloretsua osatu zuten. Inauteriak gaur segituko du eta epaitu ondoren, arrats aldera erreko dute Zantantzarra, gero Errobira botatzeko. Baionako zenbait saltoki Txinako hornidurez apaindu dituzte.

GIZA ESKUBIDEAK

Eusko Jaurlaritzako Giza Eskubideetako zuzendari kargua hartu du Txema Urkixok

Eusko Jaurlaritzako Giza Eskubideetako zuzendari berria, Txema Urkixo, lanean hasi zen atzo Laku. Kargua hartu eta berehala, Urkixok bilera egin zuen Joseba Azkarraga Justizia sailburuarekin. Giza eskubideei buruzko egitasmoak, biktimen arretarako zerbitzuen funtzionamendua eta justizia auzitegiekin izan beharreko harremanak azaldu zizkion kontseilariak Urkixori. Talde bakoitzaren aritutasuna da Giza Eskubideetako zuzendari berria; besteak beste, Bakearen Aldeko Koordinakundeko sortzaileen artean izan zen Urkixo.

EUSKARA

Datorren larunbatean egingo du Andolin Eguskitzak euskaltzain oso gisako sarrera hitzaldia

Euskaltzaindiak atzo jakinarazi zuenez, gaur zortzi egingo du Andolin Eguskitza idazleak euskaltzain oso izendatua izateko sarrera hitzaldia. Ekitaldia Santurtzi bere jaioterriko udaletxean egingo du Eguskitzak. Euskaltzain oso berriaren hitzaldiaren aurretik, Euskaltzaindiako beste kideek itsasontziz egingo dute Bilbo eta Santurtzi arteko bidea. Portuan zain izango dituzte Eguskitza bera eta Javier Cruz Santurtziko alkatea. Euskal Idazleen Elkarteak lehendakaria da Eguskitza.



CRISTINA ABADIA / EFE

EGURALDIA

Elurrak ez ditu itxi mendate nagusiak

Elurra mara-mara egin zuen atzo Euskal Herriko mendietan. Goizean, zenbait eragozpen sortu zituen mendate garaienetan. Nafarroako Urbasan, Lizarragan, Abaurregainan, Uitzin eta Goñin, esaterako, kateak behar ziren goizean, baina egunak aurrera egin ahala, errepideak garbitu egin zituzten. Irudian, Iruñerako bidea erakusten duen bideseinale bat, elurrez estalita, Sorogainen (Erroibar).

EZBEHARRA

Emakume bat hil da auto istripuz, Armiñonen

Seat Toledo auto batek eta Citroen AX batek aurrez aurre talka egin zuten atzo 14:00 inguruan, N-124 errepidean, Armiñon herrian (Araba). Kolpearen ondorioz, AXko gidaria ibilgailuko burdinen artetik atera ezinik geratu zen. Suhiltzaileak eta anbulantzia ezbeharraren lekura hurbildu arren, ezin izan zuten emakumearen bizia salbatu. Beste gidaria ere zauritu zen istripuan, eta Miranda de Ebroko (Burgos) ospitalera eraman zuten.

GAZTEAK

Bigarren Gazte Plana uda aurretik jarri nahi du abian Eusko Jaurlaritzako Kultura Sailak

Miren Azkarate Eusko Jaurlaritzako Kultura sailburuak atzo iragarri zuenez, Gazte Plan berria ziur asko uda aurretik jarriko dute martxan. Plan horrek, Jaurlaritzaren bigarrenak, gazteriaren aldeko politika instituzional guztiak koordinatzea du helburu.



Eros ezazu urtebetean interesik gabe J. Bengoa

Bulebarreko arkupeak, 20 DONOSTIA
Mamut musika zentroa OIARTZUN